

Partido ABO

Despues di 'WEB-hedging', awo e berdad di 'All inclusive' hotel pa Aruba

ORANJESTAD - Net manera a pasa den e caso di 'WEB-hedging', awo ta pasando den e caso di e benta di Radisson hotel. Den e caso di WEB, pueblo a haya sa pa un incidente mundial, e caida drastico den e prijs di petroleo, cuanto daño esunnan encarga cu e maneho di energia a hinca e isla y e pueblo aden. Pero te ainda tur esunnan responsabel a keda sinta riba nan stoel y pueblo ta sigui paga pe supuesto 'error'!

Den e caso di e benta di Radisson hotel, pueblo por a scucha gobierno y diferente gremionan (ATA, ATIA, AGA y AHATA) bisa con debil e situacion economico ta y con malo y dañino un otro 'All inclusive' hotel lo ta pa e isla. ATIA tin como principal preocupacion, e 'Spin-off effect' negativo cu e establecimiento di un otro 'All inclusive' hotel lo tin pa e comerciantenan manera restaurantnan, tiendanan, taxistanan y tur otro partnernan den e industria turistico.

Confirmacion total cu gobierno y e gremionan tabata na altura di e situacion debil y cu un inclusion di un otro hotel 'All inclusive' lo no ta bon pa e isla. Atrobe si e no tabata pa cu e benta di Radisson hotel a bay fout, awe pueblo lo no a tende nada di e efectonan

negativo cu un otro 'All inclusive' hotel lo tin pa e isla.

Awo si gobierno y e gremionan tabata sa cu un otro 'All inclusive' hotel lo ta dañino, anto dicon nan a keda keto ora gobierno kier a sacrificar dos di nos beachnan prestigioso, Baby Beach y Mangel halto, pa mas hotel 'All inclusive'?

E argumento cu ta wordo uza cu mester haci un excepcion pasobra e area di pariba di brug mester di algun actividad economico, ta wordo mal uza y tin un meta politico cu e solo proposito pa enriquece algun hende y mantene nan na poder a costo di e pueblo y su naturalesa.

Durante e eleccion di 2013,

e ministernan Mike Eric de Meza y Oslin Benito Sevinger a declara publicamente cu no lo por bin ningun hotel pariba di brug, pasobra no tin un infraestructura pa cargA esaki. Mira, ni un aña despues, ata dos 'All inclusive' hotelnan ta wordo anuncia riba dos beachnan bunita riba e costa zuid di pariba di brug. Unda e infraestructura cu a wordo uza como argumento politico pa no desaroya pariba di brug a keda?

Tanto afan, cu hasta a wordo anuncia cu lo cuminsa cu construccion na februari 2015! Tur tramitanan ta wordo haci pa duna e companianan cu ta desaroya e terrenon y tur e permisonan

necesario sin cu a consulta cu e pueblo, sin cu a cambia e plannan di Ordenansa Territorial y sin cu tabata tin un estudio di e impacto social y di medio ambiente haci.

Gobierno y e gremionan a admiti cu un otro 'All inclusive' hotel ta malo pa e isla. No por tin argumentacion pa bisa cu locual ta malo pa un parti di e isla lo ta bon pa e otro. E impactonan negativo ta conta pa henter e isla. Aki nos no ta papiando di un pais grandi. E distancia entre Oranjestad y San Nicolas ta 22 kilometer!

Si no tabata cu e deal di Radisson hotel a bay fout, pueblo lo no a haya sa atrobe cu incluyendo mas hotel 'All

inclusive', lo ta un drama y Aruba lo a perde Baby Beach y Mangel halto.

E ta obvio cu intencionalmente algun hende kier sigui perhudica Aruba, su hendenan y su naturalesa pa beneficienan personal, uzando e debilidad di e hendenan cu no tin trabou.

Nos di partido ABO ta bolbe ripiti, no pasobra cu esunnan cu mester a traha pa e pueblo a haci cu awe Aruba ta e pais number 4 mundial, cu ta depende di turismo pa sobrevivir, cu nos mester ta un pedido di limosna y tin cu acepta tur cos. E asunto di 'masa turismo' no ta Aruba su solucion ni destino. Esaki solamente lo causa mas problemanan social, laboral y ambiental. Nos no mester perde nos beachnan of destrui nos areanan natural pa algo temporal pero cu efectonan permanente. Nos no mester di mas 'cheap labor' of mas hende di afo.

Awo cu gobierno y gremionan a admiti cu un otro 'All inclusive' hotel lo ta dañino pa e isla, ainda bo persona lo laga bo mes wordo manipula y gaña? No lubida, ta nan a causa e situacion aki y cu e incidente di Radisson hotel, el a bira obvio cu nan no tabata conta bo persona full e berdad manera nan a haci den e caso di 'WEB-hedging'. Cuanto mas nan no ta conta bo persona? □

